

玉

海

三十五

玉海卷第七十

浚儀王應麟伯厚甫

禮儀

朝儀

太微中居列宿環拱聖王正表著之位辨廉陛之
等法乎天也

堯外朝

列子仲尼篇堯治天下五十年不知天下治歟不治
歟問外朝外朝不知

舜朝會方岳

舜典輯五瑞既月乃日覲四岳羣牧班瑞于羣后歲
二月東巡狩肆覲東后五載一巡狩羣后四朝注各
會朝于方岳之下疏凡四處別朝 王制注虞夏之
制諸侯歲朝疏案尙書鄭注云巡守之年諸侯朝於
方岳之下其閒四年四方諸侯分來朝於京師歲徧
鄭志夏殷六年一巡守諸侯歲朝唯指唐虞異義云
公羊說諸侯比年一小聘三年一大聘五年一朝天
子左氏說十二年之閒八聘四朝再會一盟許慎案
公羊說虞夏制左氏說周制鄭駁之云三年聘五年
朝文襄之霸制文十五年左右傳云諸侯五年再相朝

以修王命古之制也此為夏殷之禮 通典唐虞夏

氏之時四方諸侯歲一朝殷制五年一朝 左傳哀

七年子服景伯曰禹合諸侯於塗山執玉帛者萬國

注在壽周穆有塗山之會注會諸侯唐志塗山在

春東北越傳曰禹到越望苗山會諸侯爵有德封有功更名會稽山

周三朝 四朝 朝儀 朝位 治朝外

朝 燕朝 內朝 羣臣班 射朝

天官大宰王眡治朝則贊聽治注治朝在路門外羣

臣治事之朝王視則助王平斷疏王有三朝外朝是

斷疑獄之朝路寢庭朝圖宗人嘉事二者事簡非正

朝故知治朝是路門外司士所掌者也

內宰疏王立朝者卽三朝

宰夫掌治朝之灋以正王及三公六卿大夫羣吏

之位掌其禁令注治朝在路門之外其位司士掌焉

宰夫察其不如儀疏治朝在路門外者燕朝在路寢

庭外朝在庫門外其事希簡治朝是常治事之朝

地官師氏居虎門之左司王朝注路寢門也王日視

朝於路寢門外疏其路寢庭朝及庫門外之朝非常

朝之處司士所掌路門外是常朝日所朝之所 橐

人掌其外內朝宄食者之食注外朝司寇斷獄弊訟

之朝也今司徒府中有百官朝會之殿云天子與丞

相舊決大事焉是外朝之存者與內朝路門外之朝也疏天子三朝路寢庭朝是圖宗人嘉事之朝大僕掌之又有路門外朝是常朝之處司士掌之又有外朝在皋門內庫門外三槐九棘之朝是斷獄辨訟之朝朝士掌之今言外內朝明據三槐與路門外二者以其路寢庭非常朝之處也今司徒府已下引漢法說之春官司服眡朝則皮弁服注視內外朝之事王受諸侯朝覲於廟則袞冕巾車象路注以日視朝疏謂於路門外常朝之處乘之至於三朝皆乘之夏官司士掌羣臣之版故書版爲班以治其政令正朝

儀之位辨其貴賤之等王南鄉三公北面東上孤東
面北上卿大夫西面北上王族故士虎士在路門之
右南面東上大僕大右大僕從者在路門之左南面
西上注此王日視朝事於路門外之位疏對彼大僕
職路寢庭有燕朝朝士職庫門外有外朝而言也但
彼外朝斷獄辨訟并三詢之朝有諸侯在焉諸侯既
在西方右九棘之下孤避之在東方羣臣之位西面
也其餘王公卿大夫等仍與此位同

魏志王肅曰周官則備矣五日

一朝公卿大夫並進而司士辨其位
漢初依擬前代公卿皆親以事升朝

司士擯孤卿

特揖大夫以其等旅揖士旁三揖王還揖門左揖門

右大僕前注前正王視朝之位王入內朝皆退注王
入入路門也王入路門內朝朝者皆退反其官府治
處也主之外朝則朝士掌焉玉藻曰朝服以日視朝
於內朝云云謂諸侯疏欲見天子諸侯皆有三朝之
意玉藻諸侯禮云朝于內朝者謂路門外朝爲內朝
對皋門內應門外朝爲外朝通路寢庭朝爲三朝
大僕王眡朝則前正位而退入亦如之注王旣立退
居路門左待朝畢建路鼓于大寢之門外注大寢路
寢也其門外則內朝之中如今宮殿端門下矣疏文
王世子以路門外爲外朝者對路寢庭朝爲外朝其

實彼外朝亦內朝耳既以三槐九棘朝爲外朝此二者皆內朝也王眡燕朝則正位掌摠相注燕朝朝於路寢之庭王圖宗人之嘉事則燕朝疏以其路寢安燕之處謂之燕朝與賓客饗食在廟燕在寢也但與賓客及臣下燕時亦有朝因燕而朝賓臣燕禮已有成文圖宗人嘉事者朝不見故鄭特見之

宗人冠昏

嘉禮之等皆曰嘉事

秋官大司寇注嘉石文石也

樹之外朝門左 小司寇掌外朝之政以致萬民而詢焉一曰詢國危二詢國遷三詢立君注外朝朝在雉門之外者也其位王南鄉三公及州長百姓北面

羣臣西面羣吏東面小司寇擯以敘進而問焉以眾
輔志而弊謀疏小司寇與朝士同掌之外朝在雉門
之外則亦在庫門之外也朝士掌建邦外朝之灋
左九棘孤卿大夫位焉羣士在其後右九棘公侯伯
子男位焉羣吏在其後面三槐三公位焉州長眾庶
在其後左嘉石平罷民焉右肺石達窮民焉注鄭司
農云王有五門外朝在路門外內朝在路門內立謂
外朝在庫門之外皋門之內與今司徒府有天子以
下大會殿亦古之外朝哉周天子諸侯皆有三朝外
朝一內朝二內朝之在路門內者或謂之燕朝疏天

子外朝一者卽朝士所掌者是也內朝二者司士所掌正朝大僕所掌路寢朝是也諸侯內朝二者玉藻云朝于內朝朝羣臣辨色始入君日出而視朝退適路寢使人視大夫大夫退然後適小寢彼亦路門外內二者爲內朝閔二年云閒于兩社兩社在大門內中門外爲外朝燕朝者大僕云掌燕朝之服位是也大行人上公之禮其朝位賓主之間九十步立當車軹擯者五人諸侯之禮朝位賓主之間七十步立當前疾擯者四人諸伯如諸侯之禮諸子朝位賓主之間五十步立當車衡擯者三人諸男如諸子之禮

注朝位謂大門外賓下車及王車出迎所立處也王
始立大門內交擯三辭乃乘車而迎之齊僕爲之節
上公立當軹侯伯立當疾子男立當衡王立當軫與
凡大國之孤朝位當車前不交擯凡諸侯之卿其禮
各下其君二等注朝位則上公七十步侯伯五十步
子男三十步與疏聘禮在大門外去門有立位陳介
之所朝在路門外掌訝至于朝詔其位疏外朝在
大門外詩縣乃立舉門應門正義諸侯三朝舉門
之內雖有外朝議大疑詢眾庶乃往不常在焉其君
日出所視與羣臣決事之朝在應門之內曲禮天

子當依而立諸侯北面而見天子曰覲疏是秋於廟
受覲禮也天子當立而立諸公東面諸侯西面曰朝
疏此爲春夏受朝時也爾雅門屏之間謂之立謂天
子受朝於路門外之朝於門外而立以待諸侯之
至爾雅正門謂之應門諸侯內屏在路門之內天子
外屏在路門之外而近應門注云朝者位於內朝而
序進卽路門外朝也對皋門內槐棘之外朝故稱內
若對路寢庭朝又爲外故文王世子云朝於外朝則
以官是也凡天子三朝其一在路門內謂之燕朝太
僕掌之云王眡燕朝文王世子云公族朝於內朝親

之也此王與宗人圖其嘉事及王退俟大夫之朝也
其二路門外之朝謂之治朝司士掌之云正朝儀之
位此是每日視朝之位其王與諸侯賓射亦與治朝
同故射人云三公北面云云其三皋門之內庫門之
外謂之外朝朝士掌之此是詢眾庶之朝也燕禮云
卿西面大夫北面士門西東面大射亦然周禮天子
有射朝燕禮諸侯有燕朝則天子諸侯皆三朝也

文王世子庶子之正於公族者

云云

其朝于公內朝

則東面北上臣有貴者以齒

注內朝路寢庭

其在外朝則以

官司士爲之

外朝路寢門之外庭司士亦司馬之屬也掌羣臣之班正朝儀之位

其在

宗廟之中則如外朝之位宗人授事以爵以官公族朝于內朝內親也外朝以官體異姓也疏其朝位天子之朝三公北面東上孤東面北上卿大夫西面北上其士門西東面北上若諸侯之朝案大射卿西面北上大夫北面東上士門西東面北上與天子不同玉藻諸侯朝服以日視朝於內朝朝辨色始入君日出而視之退適路寢聽政使人視大夫大夫退然後適小寢釋服也燕寢注此內朝路寢門外之正朝也天子諸侯皆三朝入羣臣入應門朱氏曰王日視朝於路朝而退聽政於燕疏天子三朝大僕燕朝一也司士路門外二也

朝士外朝三也諸侯三朝文王世子內朝路寢朝一也世子又云外朝路寢門外二也諸侯三門是中門外大門內又有外朝是三朝也月令疏天子有三朝一燕朝在路寢二治朝路寢門外應門之內二外朝在庫門之外皋門之內迎春而反賞公卿大夫於路寢門外正朝耕藉而反勞羣臣在於路寢爵賞公事與眾共之故在正朝燕勞私禮主於歡心故在路寢三禮義宗曰每朝列位所向不同其三公之位常北面不變者以三公內臣位尊故屈之其餘諸侯孤卿大夫皆以地道尊右故尊者東面卑者西面於

外朝諸侯東面於內朝孤卿東面

時無諸侯故也惟

詢事之朝非常朝之限故不與三朝同

一云容有諸侯之位故孤

卿在東

若時會殷同方嶽之下爲宮壇見諸侯之法其

位皆如明堂之位天子宮方一千二百步三分二爲路寢之前一爲路寢之後自皋門至路門凡五門相去之數未聞路寢之前至皋門凡五門之間合八百步爲三朝皆方百步諸侯三門皋門至路寢相去六百步自路寢以前爲三朝各一百步又曰周禮天子諸侯皆有朝一曰外朝二曰中朝三曰內朝其中朝之名或內或外若據外朝而言謂之內朝故鄭注